

36
2
MORBI

QVO PER SAPIENTIAM MORI
PLINIUS SCRIBIT

NATVRAM

EXPLICAT

ATQVE

ARTIS SALVTARIS CVLTORES

AD

LECTIONES

ET

DISPVTTATIONES

MEDICAS

INVITAT

CHRISTIAN. GODOFR. STENTZEL

ARTIS SALVTARIS AC PHILOSOPHIAE DOCTOR
FACVLTATIS MEDICAE ASSESSOR, CHIRVRGIAE
PROFESSOR PVBLICVS ORDINARIVS
PATHOLOGIAE PROFESSOR SVBSTITVTVS.

VITEMBERGAE

IMPRESSVM VIDVAE KOBERSTEINIANAE LITERIS.

Epictetus Enchiridii

Cap. 57.

Οταν τὶ διαγνῇς ὅτι ποιητέον ἐστὶ, ποιῆς, μηδέποτε Φύγης ὁφθαλμοῖς καὶ πρᾶσσων αὐτὸ, καὶ ἄλλοῖόν τι ὅς ποιοι μέλλωσι περὶ αὐτοῦ ὑπολαμβάνειν. Εἰ μὲν γὰρ ἐκ ὀρθῶς ποιῇς, αὐτὸ ἔργον Φεύγεις· εἰ δὲ ὀρθῶς, τὶ φοβῇ τὰς ἐπιπλήζοντας ἐκ ὀρθῶς.



Ature fiat senex, qui diu uult esse
senex, ac quod cuique in uegetae
subsidium senectutis faciendum est,
id ne sero facere incipiat; sera
quippe in fundo parsimonia; se-
rum cauendi tempus in mediis
malis; serum, post male rem ge-
stam, auxilium; sera, in decrepita

actate, exacta uictus uitaeque ratio, iuuentutis neglecta
annis. Nulla in re modum humana tenere nouerunt
ingenia, eaque a labore & sobrietate auocata, ad otium
ac luxuriam disposita & procliuia abripiuntur; natura
omnium hominum in uitium sequax, atque in malum
fertur prona, uirtutibus, ad quas accliuis est atque ar-
dua semita, neglectis; nemo est, qui non aliqua culpa
erroris humani teneatur; nemo mortalium omnibus ho-
ris sapit; est commune malum, semel insaniuimus omnes.
Peiora cum primis adolescentes praecepta facile audi-
unt promteque exequuntur; adolescentia lubrica, fer-
uida atque ad omnis uitia generis propensa est; iu-



uenis monitoribus asper Horatio audit ; iuuenile uitium est, regere non posse impetum aetatis. Dehinc, cum nimia humanae fragilitatis iuuenilibus annis sit obliuio, eiusque aetatis homines, ea saltem, quae ante pedes sunt, uideant atque obseruent, non prospicientes, quae futuro metuenda impendeant tempore, ratio in apri-
co est posita, cur non intellecta obrepat senectus ? cur praematurum, grauius stipatum molestiis ac morbis senium, in ipso etiam aetatis flore, accedat ? intemperans enim adolescentia effoetum corpus tradit senectuti, ac magna graues semper comitantur crimina poenae. Iuenum contra frugalitas & sobrietas, prosperae est medicina uoletudinis, certus longaeuitatis custos, exoptatum senectutis condimentum & fulcrum ; imo laboriosa iuuentuti studia, iucunda sunt senectuti otia & deliciae. Optime ita Xenophon, conspecto iuene industriis, labori ac temperantiae addictissimo, sequenti eundem laudauit exclamatione: Κάλλιστον, Φίλον τέκος, ὅψον τῷ γήρατι ἀετύνεις, iucundissimum, charissime fili, senectuti condis obsonium. Gorgias interrogatus, quod uitae tenuisset genus, cuius ministerio ad tantam peruenisset senectutem, respondisse fertur: ἔδεν ἔδέποτε πρὸς ἡδονὴν ἔδὲ Φαγῶν, ἔδὲ θεάσας, nunquam uoluptati, in edendo, aut aliis rebus perficiendis, obtemperans. Nihil est tam mortiferum hominibus, quam luxuria ; intemperantia est nutrix medicorum, atque ingluuius fons & fomes morborum. Iuuenta igitur prudenter utendum, minime uero eadem temere abutendum. Senum prudentia longo comparata usu iunioribus opus est, eiusque beneficio atque applicatione, spretis repudiatisque omnibus uoluptatibus, huiusmodi uictus uitaeque ratio tempestiue deligenda atque ineunda, quae bonam corporis dispositionem mentisque tran-
quil-

quillitatem tuendo, aequales semper vires & integram quam diutissime ualeitudinem procurat, atque incommoda, quibus alias senectus obruitur, quam longissime a nobis abarcet. Durum est, ea relinquere, quibus adolescens assueueris, mala quippe consuetudo, a tenera ad maturam protracta aetatem, est correctu difficillima, ne dicam impossibilis. Durius adhuc & operosius est, tum mentis, tum corporis morbos, uegeta contractos adolescentia, crescentibus, decrescente corporis robore, annis, corrigere atque extirpare, inueterata enim uitia aegrius depelluntur. Non minor est uirtus, quam quaerere parata tueri. Melius & certius sibi consulunt, qui de praesente conseruanda, quam qui de amissa restauranda sanitate solliciti atque occupati sunt. In summum huius uniuersi architectum ingrati sunt, qui serpentum, nouo senectam uere cum cute exuentium, & perpetua fruendum iuuenta conditionem, humana meliorem iudicant. Non saltem serpentes, non aquilae duntaxat ac cerui hoc obtinent beneficium, sed idem etiam, prae omnibus aliis animantibus, homini, modo rationi morem gerat, tributum est. Respice priscorum hominum longaeuitatem, considera sanitatis, qua fuebantur, integritatem, certissima sanitatis ac longaeuitatis priuilegia homini concessa ac tributa deprehendes. Tua est culpa, tuum peccatum, qui, repudiato horum priuilegiorum usu, ipsis hinc expectandis beneficiis te priuas. Derelicta uetus simplicitas, qua maiores nostri delectabantur, ac suffecta in illius locum gulae uoluptas, & contrariae alimentorum potulentorumque indolis, qua corpus repletur, farrago, gentuna tot ac tam multiplicium morborum, tam breuis uitae termini, qui omnibus fere iam euenit, causa existit. Cum olim, sunt Cypriani uerba,

ad nongentos aut octingentos annos, uita hominum longaeua procederet, uix nunc potest ad centenarium numerum peruenire. Canos uidemus in pueris, capilli deficiunt, antequam crescant; nec aetas in senectutem definit, sed incipit a senectute, adeo, ut ad finem natiuitas properet.

Plures iam de hac generis humani calamitate conuesti fuere; referti sunt huiusmodi querelis philosophorum libri. Euolue Senecam, audi Platonem, lege Plutarchum, inspice Aristotelem, ausculta Hippocrati. Homo, ἀδυνείας ὑπόδειγμα, καιρῶν λάφυρον, τύχης παίχνιον, μεταπτώσεως εἰκὼν, φθόνου καὶ συμφορᾶς πλάσιξ, τὸ δὲ λοιπὸν φλέγμα καὶ χολή, hoc est, imbecillitatis exemplum, temporis spolium, fortunae lusus, inconstantiae imago, inuidiae ac calamitatis trutina, quod restat, pituita ac bilis ab Aristotele dicitur. Plutarchus, ἀνθρώπους ἀπὸ σαπρῶς καὶ παλαιῆς σήμονος κρεμαμένους, homines a putrido ac ueteri filo pendere, perhibet. Ex Hippocratis sententia, ὅλος ὁ ἄνθρωπος ἐκ γενετῆς νόσος, totus nempe homo a natiuitate morbus est. Omnia sunt hominum, canit Ouidius, tenui pendentia filo, & subito casu, quae ualuerunt, ruunt. Quod in exiguum aevi gignamur, quod haec tam uelociter, tam rapide dati nobis temporis spatia decurrant, adeo, ut, exceptis paucis, ceteros, in ipso uitae apparatu, uita destituat, Epicuraeorum apud Senecam sunt querelae. Deplorat morbos suos, scribit Ditherrus, quibus possidetur, hoc corpusculum; deplorat incertam ualitudinis conditionem & ambiguitatem uitae. Quae namque aetas, aut tempus est, quo non a malo oppugnatur aliquo? Nonne, simul ac natum est, humidisque matris e locis recens euulsum, luto sordibusque diffluit, uagitu omnia complet ac lacrymis? Postea, si ad aetatis

lis florem adolescat, feruore quodam & intemperie agitur. Si perueniat ad pubertatem, prae ardore animi ac uehementia, nullis consiliis, in officio contineri potest, nullis monitis. Si ad senectutem, paulatim moritur & deflorescit. Innumera adhuc & Theologorum & Philosophorum, imo sacrarum literarum testimonia, idem inuentionia, afferre possem, at enim uero, reliquis omnibus omissis, in eum saltem PLINII (a) locum paulo penitus inquiramus, quo multiplices generis humani calamitates describens, omnium quasi summam enucleaturus ac traditurus, in haec erumpit uerba: *atque etiam est morbus aliquis per sapientiam mori.* Pliniana haec sententia, eruditissimorum sane inter omnes gentes uiro- rum, Scaligeri, Mercurialis, Dalechampii, Schotti, Be- ueronicii, Heinsii, Salmasii, Patris de la Cerda, Casp. Calde- rae de Heredia, Waldschmiedii, ingenia, mire in diuer- sas distracta partes torsit atque exercuit. Omnes uero in obscuri huius loci explicatione occupatissimi, maio- rem refutandis aliorum erroribus operam, quam eruen- do ac demonstrando genuino Plinianae sensui locutio- nis, impenderunt. Nec ego is sum, qui me huic nodo Gordio extricando soluendoque parem iudicem; ab- sit, ut hoc mihi tribuam; absit ut hoc aliis persuade- re gestiam. Oedipo hic omnino opus est. Dauid ego sum, non Oedipus. Perfacilis esset huius scrupuli so- lutio, si nostris Plinius uiueret temporibus, uel nos Plinii uixissemus seculo, quo, quae allegatae sententiae sit significatio, quae Plinii mens, ex eodem quaerere possemus. Experiri tamen licet, quid ualeant humeri, quid ferro reculent.

Ad

(a) Hist. natur. edit. quae Basileae 1554. in folio, apud Frobenium prodit, lib. 7. cap. 50. p. 123.

Ad duo autem, in commemorati explicatione apoph-
tegmatibus, attenta respiciendum mente, primum nempe,
ad loquendi scribendique rationem, Plinio Pliniique tem-
poribus usitatam, deinceps ad totius capitis, cui haec sen-
tentia inserta reperitur, contextum. Plinianus stylus con-
cisus & sententiosus est, ita, ut idem paucissimis saepe
verbis, plures magni momenti res complectatur ac de-
scribat. Si praeterea capitis, ex quo locus explicandus
desumptus est, contenta expendamus, nihil, quam plura
argumenta pluraque exempla calamitatum atque incom-
modorum, quibus homines obnoxii sunt, apprehendi-
mus. Iam fato mortales derepente visu priuatos, iam
aegrotos a Medicis derelictos, praeter spem atque ex-
pectationem, fato seruatos fuisse, declarans, haec tandem
Plinius subiungit: incertum ac fragile nimirum hoc
munus naturae est, quicquid datur nobis; malignum
uero & breue est in iis, quibus largissime contingit, uni-
uersum utique aevi tempus intuentibus. Quid, quod
aestimatione nocturnae quietis, dimidio quisque spatio
uitae suae uiuit? Pars aequa morti similis exigitur, aut
poenae, nisi contingit quies. Nec reputantur infantiae
anni, qui sensu carent, non senectae in poenam uiuacis.
Tot periculorum genera, tot morbi, tot metus, tot cu-
rae, toties inuocata morte, ut nullum frequentius sit uo-
tum. *Natura uero nihil hominibus breuitate uitae praestitit
melius.* Hebescunt sensus, membra torpent, praemori-
tur uisus, auditus, incessus, dentes etiam ac ciborum in-
strumenta, & tamen uitae, hoc tempus annumeratur. Hoc
modo miseram humanae conditionem uitae, atque innu-
meras, quibus acerbè mortales affliguntur ac torquen-
tur, aerumnas, Plinius describit, ac paucis, quae quo-
rundam hominum longaeuitatem, miraculi instar suspe-
ctam,



Etiam, spectant, interiectis, tribus, tanquam in summa, uerbis, omnia coniunctim comprehensurus atque expressurus, *atque etiam, inquit, morbus est aliquis per sapientiam mori.* His igitur omnibus in connexione, quam antecedentia sistunt, rite examinatis, ac cum Pliniano scribendi philosophandique genere collatis, uerisimile uidetur, quod hic per *morbum*, non certa atque unica infirmitatis species, sed omne, quotquot humano eueniunt generi, affectuum genus indicetur atque innuatur. Cum phrasis: *per sapientiam mori*, uniuersalem naturae fatique prouidentiam & legem, quae omnes homines morti subiecit, qua, tanquam sapientissimo naturae instituto, ab omnibus liberantur malis, designet. Ex Plinii enim mente, τὸ mori, pro naturae fatique reputandum beneficio, uti ex antecedentibus clare liquet, quibus expresse fatetur: *quod natura nihil hominibus breuitate uitae praestiterit melius.* Prorsus ita est, per causas medias uarie nexus, prima illa causa omnia temperat, suauiter, prudenter, utiliter, nec aliter est censendum. Fatum ita, hoc est, prouidentiam decretumque diuinum, in morborum hisque succedentis mortis generatione considerabat ac credebatur Plinius. Fatis agimur, Stoicus scribit Philosophus, cedite fatis; non sollicitae possunt curae mutare rati stamina fati. Quicquid patimur mortale genus, quicquid agimus, uenit ex alto. Non illa Deo uertisse licet, quae nexa suis currunt causis. Ex hoc fonte Plutarchus consolationem, Apollonio praematurum filii obitum lugenti datam, hausit, ἐκείνω δὲ, inquit idem, τῷ μακαριζέντι ἔκ ἧν κατὰ φύσιν περαιτέρω τῆ ἀπονεμηθέντος αὐτῆς χρόνῳ πρὸς τὸν ἐνθάδε βίον περιμένειν, ἀλλὰ εὐτάκτως αὐτὸν ἐμπλήσαντα πρὸς τὴν εἰμαρμένην ἐπάγειν πορείαν.

καλῶς αὐτῆς Φύσεως ἤδη πρὸς ἑαυτήν. Trahunt hoc modo nolentes ad mortem fata, uolentes ducunt. Nam, ὅτε δὲ γενέσθαι, scribit Herodotus, ἐπ' τῷ θεῷ, ἀμύχανον ἀποτρέψαι ἀνθρώπων. Sapientes exinde ac diuinarum rerum peritos, eos Epictetus appellat, qui fato se accommodant, iam morbum, iam mortem afferenti, ὅς τις δὲ, sunt illius uerba, ἀνάγκη συγκαχώρηκε καλῶς, σοφὸς παρ' ἡμῖν, καὶ τὰ θεῖα ἐπίσταται. Obstare uero huic nostrae explicationi uidetur epitheton: *aliquis*. Atque etiam, sunt Plinii uerba, *morbus est aliquis, per sapientiam mori*. Sed nexu, in quo hic uerbum, *aliquis*, adhibetur, perspecto, omne, quod nobis moueri potest, dubium, euanescit; nam uocabulum, *aliquis*, non hanc illamue affectus speciem, sed omnem, eumque omnibus hominibus certum, quicumque etiam sit, morbum, ex quo mors certo certius expectanda imminet, denotat. Discrepans est hominum constitutio, maximum in eorum educatione ac uitae uictusque ratione obseruatur discrimen; unde non mirandum, si mors, quae omnibus certa, diuerso inducatur morbo. Est tamen *aliquis* ex tot infirmitatum myriadibus, quae te, quae me, quae quosuis peraeque mortales, sublato cordis totiusque corporis motu, abolitoque sensu omni, omnis, qua uiui cruciabamur, calamitatis malique expertes reddet.

Si saluberrimis Christianae doctrinae praeceptis Plinius imbutus fuisset, optima sane certissimaque futurae post mortem beatitudinis, qua fideles piiue in aeternum fruuntur, documenta, citatum apophtegma exhiberet; enim uero, uera, quae ex diuino hauritur codice, sapientia Plinius destitutus erat, hinc idem res humanas, mortem praesertim, eaque, quae illi succedunt, quasi

quasi per transfennam aspiciens ac contemplans, incertus ac suspensus obscura futurorum spe pendeat. Hoc tamen ex allegatis obscurum esse nequit, quod Plinius temporalis tum necessitatem, tum utilitatem mortis aliquo modo agnouerit, ac citatis indicarit uerbis; ferius certe aut citius mors sua quemque manet; est commune mori, mors nulli parcat honori; omnes una manet nox & calcanda semel uia lethi; moritur quisque nostrum inter negotia; mors & fugacem persequitur uirum; mors non curat munera; mors aequabit, quos pecunia separauit; mors sceptris ligonibus aequat; mors aequo pulsat pede pauperum tabernas regumque turres; omnes eodem cogimur, omnium uersatur urna; moriendum est omnibus, estque finis miseriae in morte; mors laborum & miseriarum quies; mors ultima linea rerum, mors meta malorum; quem Deus diligit, adolescens moritur. Et originem, & causam, & potestatem, quam in omnes peraeque homines mors exercet, sequentibus Paulus ob oculos posuit: δι' ἐνὸς ἀνθρώπου ἡ ἁμαρτία εἰς τὸν κόσμον εἰσῆλθε, καὶ διὰ τῆς ἁμαρτίας ὁ θάνατος· καὶ ὕτως εἰς πάντας ἀνθρώπους ὁ θάνατος διῆλθεν, ἐφ' ᾧ πάντες ἥμαρτον. In uita nihil est, nisi propagatio miserrimi temporis; in uita nulla est intercapedo molestiae. Quid aliud est uita, quam iter ad mortem? quam peregrinatio quaedam, tot undique periculis obnoxia, tot casibus obiecta, tot malis stipata septaque? cui nulla hora, nullo momento non imminet finis, qui leuissimis de causis, iisque inopinatis, der repente accidere potest. Excussis igitur uulgi paganorumque uerum ueri Dei cultum ignorantium sensibus, mortem haud pertimescamus, peruersam potius uitae peccatis contaminatae ra-



tionem auersemur, cuius fructus aeterna nullo redimenda pretio calamitas, uti & gentiles philosophi ex lumine naturae perspexerunt, quorum optimum testem atque interpretem Platonem habemus, qui, idem sequentibus indicauit: πολλῶν γὰρ ἀδικημάτων γέμοντες τὴν ψυχὴν εἰς ἄδ' ἀφικέσθαι πάντων ἔχατον κακῶν ἐστίν. Illa igitur persuasio uulgiue error te haud occupet, quod, uti Aristotelis, philosopho plane indignum, fert scitum, θάνατος πάντων τῶν φοβερῶν φοβερώτατον, mors omnium terribilium terribilissimum sit. Melius de morte Plato tulit iudicium, θάνατον ἐλάχιστον τῶν κακῶν, mortem, minimum malorum, appellans. Propius ad scopum Stobaeus atque Arrianus accedunt, quorum illi, τὸ θανεῖν, κακῶν φάρμακον μέγιστον, mors, optima calamitatum medicina, huic uero, λιμὴν πάντων, ὁ θάνατος, mors, omnium malorum portus, audit. Non igitur mors ipsa, sed praeconcepta de morte opinio nos anxios, dubios & moestos reddit. Certe non uiuimus, uitaque, qua fruimur, morte longe deterior atque acerbior est, quamdiu mentis perturbationibus, in primis mortis metu affecti concutimur, ac nauis instar fluctibus maris conuulsae distrahimur. Mors sincero Christiano est ianua, est uia ad aeternam, quam nobis promisit, quam parauit Saluator noster, uitam. Quid? quod & ex ethnicis prudentiores hoc affirmarint & crediderint, uti Strabonis, quam de morte uitaque aeterna tulit, sententia constat, νομίζεν χρῆ, ait ille, τὸν μὲν ἐνθάδε βίον, ὡς ἂν ἀκμὴν κυομένων εἶναι, τόνδε θάνατον γένεσιν εἰς τὸν ὄντως βίον καὶ τὸν εὐδαίμονα τοῖς φιλοσοφήσασιν. Et Maximus Tyrius, τὸν θάνατον, ἀθανασίας ἀρχὴν, καὶ γένεσιν μέλλοντος βίος, mortem, immortalitatis initium, ac futurae medium uitae, nuncupat. Nihil hinc causae uideo, cur uita nostra, quae innumeris taediis ac miseriis est referta atque obruta,

tam

tam arcte & sollicitè retinenda? cur longaeuitas tam anxie, & saepe mediis minus licitis, quaerenda atque expetenda sit? Non quam diu, sed quam bene uiuas, ac quibus rebus uitae tuae tempus impendas, attentissimus attende. Cum nos denique uelimus, nolimus, quae uult, quae iubet uniuersi Creator, exequi teneamur, melius omnino erit, si hilares, prompti, uigilantes, accincti, intenti, tanquam in acie armati, diuina ducti manu, e uita secedamus, quam illacrymantes, reluctantes, inuiti, dolentes, coacti, ui & impetu tracti, e uiuis furripiamur. Quotidie morimur, quotidie demitur aliqua pars uitae, & tunc quoque, cum crescimus, uita decrescit, ac corporis uigor uigentibus minuitur annis. Quicquid transit temporis, perit; hunc ipsum, quem agimus, diem, cum morte diuidimus. Tua igitur, qui haec uerba legis, intensissima semper sit cura, ut talem te cogitationibus, uerbis, factis, Sancti adiutus gratia Spiritus, praestes, qualem uelles esse, si iam iam esses moriturus. Omni hinc tempore, nos futuro, reiectis huius mundi sarcinis, itineri, alacres laetique, adornemus, ut merito Christi confisi, in uera peccatorum nostrorum agnitione & deprecatione, recta ad aeternam uitam, omnium plenissimam bonorum, proficiscentes euolemus. Qui hac ratione, futuri spe gaudii plenus, hunc mundum mundanaque generoso & bene composito contemnit & derelinquit animo, is uere *per sapientiam moritur*, is sapientissima uitam finit ratione, secutus in eo Paulum, cuius uita solus erat Christus, mors uero maximum, quod expectabat, quod desiderabat, lucrum, ἐμοὶ γὰρ, inquit, τὸ ζῆν χριστός, καὶ τὸ ἀποθανεῖν κέρδος, mihi enim uiuere, Christus est, & mori, lucrum.

Hae meae in Plinianam sententiam coniecturae, a Scaligeri Heinssique meditationibus non multum alienae sunt.

funt. Quale uero ac quantum, inter meam, & allegatorum explicationem auctorum, intercedat discrimen, sequentibus iam eruere ac demonstrare conabor. Vterque, tum Scaligerus, tum Heinſius, unam eandemque fouet ac propugnat opinionem. Vterque in refutando Dalechampii, Mercurialis & Salmaſii, *per ſapientiam mori*, phrenitidem interpretantium, dogmate, occupatiſſimus eſt. Vterque praefentem Plinii locum, per Graecas loquendi formulas, τὸ μὴ ἀτάκτως θανεῖν, τὸ μὴ ἀμεθόδως θανεῖν, illustrare annititur. Quid ſit ſapientia, ſcribit Heinſius, hoc loco non uiderunt eruditi. Vnde error omnis & digladiatio. Quam uocem Plinii aetate, caſui, καὶ τοῖς παρὰ τὰξιν γινομένοις opponebant. Vt, cum Tacitus dixit, in ſapientiam uertenda, quae caſus obtulit. Nihil tam eſt ἀτακτον, quam caſus; caſu, quae fiunt, ordinem non habent, inquit Auerroes. Ne Hebraeis quidem quicquam tam uſitatum eſt, quam ut ſapientia, pro certo ordine ponatur. Vnde fit, ut τὸ CHOCHNA καὶ τὸ KEDI ſemper opponatur. Alterum quippe ex ſe definitum, alterum τὸ ἀτακτον designat. Mori ergo dicitur per ſapientiam, qui ordine, καὶ ἐκ ἀτάκτως, & cum quodam artificio naturae moritur. Quale artificio ac τάξις ἐν ταῖς περιόδοις. Sapientia, quod ἀτελῶς ex more ſeculi nunc dicitur, eſt ſapientia naturae, ſiue ordo quidam definitus. Ipſe Plinius, ne dubitemus, ordinem hunc, legem dixit: *morbis enim quasdam leges natura poſuit*. Per ſapientiam mori eſt, ἐκ ἀνευ τάξεως θανεῖν. Quod Plinius uoluit, Graeci tui dicerent, ὥς ἡδὴ καὶ νόσον τινὰ εἶναι, τὸ μὴ ἀτάκτως θανεῖν. Nam, quemadmodum medici proprium eſt, εὐμεθόδως ἢ γὰρ τεχνικῶς ἰατρεύειν, quod eſt Plinio, ſapienter ſeu per ſapientiam curare: ita & natura inuenit, quomodo quis per ſapientiam, & quasi



quasi artificio, extingueretur. Quod genium illius aevi
spirat, quem non satis eruditi penetrarunt.

Ignoscant uero mihi manes Heinsii ac Scaligeri; igno-
scant mihi horum doctissimorum uirorum fautores atque
affectae, si pauca quaedam, quae circa allegatam explica-
tionem monenda habeo, desideria ac momenta adiungam.
Primum enim, nec Heinsius, nec Scaligerus, indicarunt
atque exposuerunt, an quaeuis hic intelligatur infirmi-
tas? uel, an certa duntaxat morbi species? ac quae & qua-
lis? Non enim sufficit dicere, de illis morbis sermo-
nem esse, qui certas habent periodos, uel qui, uti Hein-
sius loquitur, *περιοδικῶς ὡς ἐπὶ τεταγμένῃ χρόνῳ*, accedunt,
abeunt, redeunt, intermittunt, remittunt, cessant, peri-
munt. In multis pariter aegrotis phrenitide laboranti-
bus ac pereuntibus, descripta rerum facies, ac ceriae
obseruantur periodi, ac de phreniticis simili plane iure
dicere possum, eosdem *ἐν αὐτῇ τάξεως θανεῖν*. Cur igitur,
his ita constitutis, Heinsius & Scaligerus tam acriter
contra eos, qui phrenitidem hic a Plinio intelligi ac
describi censent, disputantes, sibimet ipsis manifeste
contradicunt. Deinceps, certum quidem, quod omnes,
ex ordine ac lege naturae, mori teneantur, *ἀποκείται*, scri-
bit Paulus, *τοῖς ἀνθρώποις ἀπαξ ἀποθανεῖν*, hominibus semel
moriendi iniuncta necessitas; sed hic naturae ordo, siue
τάξις, neruum sententiae, *per sapientiam mori*, non exhaurit.
Multo minus hoc naturae institutum, uti dicitur, ad pe-
riodicos saltem morbos, sed quoscunque, qui uitae im-
ponunt finem, applicandum atque extendendum. Cui
accedit, quod morborum periodi, non a quadam, quam
alii sibi imaginantur, naturae prouidentia ac sapientia, sed
a diuersa materiae peccantis, iam quiescentis, iam motae,
variaeque solidorum ac fluidorum constitutione, non ex-
cluso

cluso rerum externarum concursu, dependeant. Vnde
 sapientia, per quam mori scribit Plinius, nec ad mor-
 bos, morborumque periodos, nec ad mortem, mortis-
 que, qui nullus mihi uidetur esse, ordinem, sed ad effe-
 ctus potius, quae mortem sequuntur, emolumenta, re-
 stringenda. Etiam gentiles philosophi animae immorta-
 litatem agnoscebant, magnaue illi post mortem parata
 gaudia, sibi concipiebant. Horum, praeter alios, testem
 habemus Solonem, qui sequentem in modum de futura
 post mortem uita differit: τὸ μὲν σαφὲς εἶδέναι περὶ τῆς
 μελλομένης ζωῆς ἐν τῷ νῦν βίῳ ἀδυνατόν ἐστιν ἢ παγχάλεπον. Grae-
 ca denique formula, ἔκ ἀνευ τάξεως θανεῖν, qua suam sen-
 tentiam Heinsius illustrare studet, τὸ Plinianum, *per sa-
 pientiam mori*, non satis bene, nec satis distincte expri-
 mit, imo, illi aliqua ex parte repugnat. Merito hic
 de morte dicere possumus, quod olim Archidamus
 de bello pronunciauit; ille enim a Peloponnesiaci
 sociis belli sollicitatus, ut certum tributorum expen-
 sarumque modum & ordinem constitueret ac prae-
 scriberet, respondebat, ὁ πόλεμος ἔ τεταγμένα σιτεῖται.
 Eadem plane ratione maiorque ueritatis suffragio
 de morte asserere possumus, ὅτι ὁ θάνατος ἔ τεταγμένα
 σιτεῖται, quod nullum mors ordinem, nullum obser-
 uet modum. Quid in rebus humanis, quae omnes
 incertissimae, certius est morte? quid uero mortis ge-
 nere? quid mortis hora incertius? Mors nullas
 agnoscit leges; mors omnem respuit ordinem; mors
 modo, quem desideramus, se non accommodat; mors
 non pietati, non eruditioni, non moribus, non robori,
 non aetati denique parcit; nisi quod eadem senibus
 est prae foribus, iuuenibus autem in insidiis. Qualem
 tandem, τὸ ἔκ ἀνευ τάξεως θανεῖν, sapientiam, cuius Plinius



alio plane sensu mentionem facit, arguat, non perspicio; & illi, qui intercluso per laqueum spiritu, aut truncato capite, uel erosio, inflammatis, obstructisue, deglutito ueneno, uisceribus, extinguuntur, *ἐκ ἀνευ τάξεως ἀποθνήσκουσιν*. Quis uero, si *αὐτοχειρίας* fautores excipias, affirmabit, huiusmodi mortis genere enectos, *per sapientiam mortuos fuisse?* Quod restat, *τὸ mori per sapientiam*, male ab Heinio naturae appellari artificium, existimo; alias certe, allegata sententia optime militum ac heluonum morti accommodari posset. Horum uariae sunt artes, uariis iidem utuntur adminiculis, quibus, tenui uitae filo abrumpendo, omni student sedulitate. Huiusmodi uero homines *per sapientiam mori*, a Sapientum abhorret mente; licet de iisdem optimo iure dicere queamus, quod artificio interemti pereant, & quidem, quod attinet heluones, ex merito: neque enim lex iustior ulla est, quam necis artifices arte perire sua.

Sed, quo dilabor, redeo iam, ambagibus ac diuerticulis relictis, ad meas, quas omnino deserui, meditationes. Prima citatum Plinii locum uice perlustrans, *morbis per sapientiam mori*, mihi nihil aliud innuere uidebatur, quam accommodatae subsidio diaetae, sanitatem fartam tectamque diutissime conseruare, donec tandem, prostrato solidorum robore, atque exhaustis, annorum copia, uiribus, ex ipsis legibus ac necessitate naturae, animo bene composito atque ad mortem praeparato, integro intellectu, obeamus. Nam, quemadmodum ultima illa aetas, officina luctus, fex uitae, colluies calamitatum, iamiam imminuentis imago mortis, atque incurabilis, ex Romani descriptione philosophi; morbus, ita propria pariter huic aetati sapientia est, cuius consilio omnes res, uita in primis & huic succedens mors, finita ex uoto administratione, exoptatam assequuntur metam. Haec sententia eo firmitus

primum menti meae infixā haerebat, quo eandem antiquorum principiis philosophorum convenientiorem deprehendebam. Ita Platoni mors senum facilis & cum uoluptate coniuncta est, ὁ δὲ θάνατος, sunt illius uerba, μετὰ γῆρας ἰὼν ἐπὶ τέλος ἀπονάτατος τῶν θανάτων, καὶ μάλλον μετ' ἡδονῆς γιγνόμενος ἢ λύπης. Eleganter haec explicat Seneca, quemadmodum in naue, scribens, quae sentinam trahit, uni rimae aut alteri obsistitur; ubi plurimis locis laxari coepit & cedere, succurri non potest nauigio dehiscenti; ita in senili corpore aliquatenus imbecillitas sustineri potest. Vbi uero, tanquam in putri aedificio, omnis iunctura diducitur, circumspiciendum est, quomodo exeas. Nam nihil habet, quod speret, quem senectus ducit ad mortem. Huic uni intercedi non potest; quemadmodum enim senectus adolescentiam sequitur, ita mors senectutem. Persuasum mihi hac ratione erat, quod *morbis per sapientiam mori*, Plinio senectutem, & quae hanc, si cetera consentiant, comitatur, sapientiam, atque artem bene moriendi, denotet. Senectus quippe, per se morbis patet; senectus ipsa, ex communi plurimorum hominum suffragio, morbus est; senectus, canit Virgilius, debilitat uires animi, mutatque uigorem. Comici, grande onus, maximum taedium, graue odium, ac quamuis fere calamitatem delineaturi, senectutem allegabant. Incertius, Φ' β' τὸ γῆρας, monet, ὅτι γὰρ ἔρχεται μόνον, metue senectam, non enim uenit sola; nam, uti probe aduertit Plato, εἰς τὸ γῆρας πᾶν συρρεῖ τὸ τῆς φύσεως ἐπικηκρον καὶ δυσάλθες, uel, uti Sophron apud Stobaeum loquitur, τὸ ἀπεχθόμενον γῆρας αἶμα μαρναίνον ταριχέυει. Quemadmodum quippe, Senecae mei est meditatio, ex amphora primum, quod est sincerissimum, effluit, grauissimum, quodque turbidum, subsidit; sic in aetate nostra, quod optimum, in primo est. Id exhauriri in aliis potius pati-

patimur, ut nobis fecem referuamus. Frustra, cum ad senectutem peruentum est, repetas adolescentiam; senectus, semel cum inuasit, regressum non habet; senectutem ut adipiscantur, omnes optant, eam accusant adepti. Si quisquam, inquit Innocentius, ad senectutem processerit, statim cor eius affligitur, & caput concutitur; languet spiritus, & foetet anhelitus; facies rugatur, & statura curuatur; caligant oculi, & oscillant articuli; nares effluunt, & crines defluunt; tremit tactus, depri- mit aestus; dentes putrescunt, & aures surdescunt. His commotus Cato senior, senem peruersae ac uitiis inqui- natae uitae deditum, sequentibus, miseram, in qua con- stitutus sit, conditionem indicans, ad seriam uirtutum culturam exhortatus est: noli aetatis tuae malis tur- pitudinem addere. Is certe, uti ob uitia corporis sene- ctute effoeti, ac mentis a uirtutibus alienae, iure merito- que pessimae aegrotis indolis annumerandus erat, ita idem artem sapienter moriendi minus callebat, minus exercebat. Melius sibi in his prospiciebat Lacon ille Senex, qui interrogatus, cur tam promissam ac canitie exosam barbam gereret, *ὡς βλέπων τὰς πολιὰς*, respondit, *μηδὲν ἀνάξιον αὐτῶν πράττω*, ut nempe intuens canos pilos, nihil illis committam indignum. Nihil turpius, quam senex uiuere incipiens; luxuria cum omni aetati, tum senectuti foedissima est. Resistendum potius senectuti est, ex Catonis apud Ciceronem praecepto, eiusque uitia diligentia compensanda sunt, pugnandum, tanquam contra morbum, sic contra senectutem; habenda ratio uoletudinis; utendum exercitationibus modicis; tan- tum cibi ac potionis adhibendum, ut reficiantur uires, non opprimantur. Nec uero corpori solum subuenien- dum est, sed menti atque animo multo magis. Nam haec quoque, nisi, tanquam lumini, oleum instilles, ex-

tinguuntur senectute. Nulla omnino maior est calamitas, quam senectus uoluptatibus praemature accersita, ac uiribus corporis animique priuata; γέρων ἀνόητος, ait Plutarchus, ὥσπερ τρίβων παλαιός εἰς ἑδὲν ἔστιν εὐθετος, senex stultus, tanquam lucerna uetusta, ad nullam rem idoneus est. Senibus mortem prae foribus expectantem Nilus sistit, illisque capillorum candorem ostendens, necessariam, ad futurum, quod iam iam instat, iter, praeparationem serio iniungit, θρίξ λελευκασμένη, scribens, τὴν ἐντεῦθεν τῆς ψυχῆς ἀποδημίαν βοᾷ καὶ διαμαρτύρεται, capilli albi, animam hinc breui abituram, tibi acclamant ac testantur. Maxime hinc Diogenes, anum, instar iuuenulae ornatae comamque, conspicatus, irridet ac perstringit, hisce eandem alloquens: εἰ μὲν πρὸς τὰς ζῶντας, πεπλάνησαι· εἰ δὲ πρὸς τὰς νεκρὰς, μὴ βράδυνε, si uiuorum in gratiam te ornas, falsa teneris persuasione; sin uero mortuis placitura hoc facis, noli moras neĉtere, sed quantum potes, festina. Haec omnia perspexit, haec omnia allegato loco Plinius explicauit; quin imo, ex illius mente, senectus, ob plura, quae enumerat, uitia, ne quidem humanae annumeranda uitae. Sed, quo haec clariora ac certiora, eo minus, expensis sedulo allegati capitis momentis atque argumentis, propositae sententiae patrocinium inueniebam. Per se quidem ex tenuis hac disputatis perspicuum, quod senes termino mortis uiciniores, ac quod diu uiuentibus natura, ut creditor immitis atque importunus, suum sibi ius, suum flagitans debitum, instet, illeque, qui modo omnia excelsa spirabat, iam imago sui, ac foetens, terrae mandandum cadauer, euadat; at, quod senectus per se sit morbus, quod sapientia senibus duntaxat competat, quod τὸ mori per sapientiam, ad senectutem senesque saltem spectet, nullus ex allegato Plinii lo-

co eruet ac demonstrabit. Sequentes uero inueni rationes, quas perpendens, colligebam, hic minime a Plinio solam senectutem, aut morbos mortemque senum innui ac describi. Primum enim, senectus cum infantia in una atque eadem a Plinio ponitur classe; deinceps idem senectutis in poenam uiuacis mentionem facit. Haec, si conferas cum sententia Plinii, qui *brevitatem uitae* pro praecipuo naturae beneficio reputat, cum quo, τὸ μὲρ *per sapientiam*, intime cohaeret, non tam senum, quam infantum potius mortem indicari atque intelligi, animaduertes. Prouocat hinc ipse PLINIVS (b) ad eorum testimonia, qui, *non nasci, optimum iudicarunt, aut quam celerime denuo aboleri*. Est ex eorum numero Eurípides, τὸ μὴ γενέσθαι, scribens, κρείσσον, ἢ Φῦναι βροτῶς, non nasci, quam nasci homines, melius puto. Consentit cum hoc Theognis, sequentibus mentem suam de hominis uita ac morte declarans: ἀρχὴν μὲν μὴ Φῦναι ἐπιχθονίοισιν ἄριστον, μὴδ' εἰσιδεῖν ἀνγὰς ὀξέος ἡελίος. Φῦντα δ' ὅπως ὤκιστα πύλας αἰδαο περῆσαι, καὶ κεῖσθαι πολλὴν γῆν ἐπαμνησάμενον, hoc est, optimum omnino hominibus est, non nasci, nec intueri feruidi radios solis; genitum uero, quam primum ad orci migrare portas, & iacere copiosa obrutum terra. Ex eodem sapientiae gentilis fundamento Menander assererat: ὃν οἱ Θεοὶ φιλοῦσιν, ἀποθνήσκει νέος, dilectus nempe Diis in iuuentute moritur. His denique addendum, quod senectus per se non sit morbus; nec omittendum, quod illi in senectutem ac senes maxime iniusti atque iniurii sint, qui uitia indiuiduorum, toti generi, tanquam communia, tribuunt, ac dehinc senes promiscue rugosos, filicerneos, acherunticos, suspiciosos,

(b) Hist. Natur. edit. cit. praefat. lib. 7. p. 104.

apricos, morosos, subdolos, incredulos, dissidentes, timidos, duros, bis pueros, nimis ad rem attentos, sibi ab unoquoque praecauentes, omnia secus interpretantes, sola calentes febre, nullis nisi sibi ignoscentes, nisi sibi indulgentes, in reprehensionibus seueros, acres in monitis, immemores iuuentutis suae, totos in baculum pronos, & lassum trahentes uestigium, marcentibus deformes oculis, putrique & saniem continuo stillante exosos naso, atque auribus corrosis molestos, appellant. Tantum enim abest, ut haec in omnibus deprehendamus senibus, ut potius multi ex iisdem uigore ac functionibus mentis & corporis iuuenes omnino superent, aut ad minimum paria iisdem praestent. Talis fuit Cyri apud Xenophontem senectus, qui annis admodum diues, cum iamiam ex hoc mundo discessurus esset, sermone ad circumstantes habito, negat, se unquam sensisse senectutem suam imbecilliolem factam, quam adolescentia fuisset. Vegeta pariter & iucunda senectute usus fuit Q. Maximus, qui, teste Catone apud Ciceronem, ualde senex, suator legis Cinciae de donis ac muneribus fuit; qui & bella gerebat, ut adolescens, cum prorsus aetate grandis esset; & Hannibalem iuueniliter exultantem patientia mollebat. Isocrates eum librum, qui Panathenaicus inscribitur, quarto & nonagesimo confecit anno, & quinquennium postea, uti idem Cato nos docet, uegetus hilarisque uixit. Simile, imo praestantius adhuc exemplum praebet Leontinus Gorgias, qui nunquam a studiis, industria ac sobrietate desciscens, centum & septem compleuit annos, ac cum ex eo aliquando quaereretur, quomodo tam tranquille molestam illam aetatem ferre ac transigere possit? nihil habeo, inquit, quod accusem senectutem. Platonem temperantia ac diligens sui tutela, senectutem optime con-

constitutam procurauit, nam uno & octogesimo anno, scribens, uti Seneca & Tullius habent, mortuus est. Quid dicam de Galeno, qui, ex relatione Fulgosi, prospera semper usus ualeitudine, nullo ante correptus morbo, aetate usque ad centum & quadraginta annos producta, decessit? Hippocrates Cous, cui plurima debebat Galenus, annos natus sexaginta nouem supra centum, huic ualedixit mundo. Licet etiam, crescentibus annis, corporis uires in senibus aliquantulum imminuantur, non tamen ea, nisi intemperantia senectutem antecesserit, aut comitetur, uitia, quorum modo facta mentio, in illis inueniemus. Certissimum horum testimonium suppeditat Cato apud Ciceronem, qui de se ipso ita loquitur: Pythagoraeorum more, exercendae memoriae gratia, quid quoque die dixerim, audiuerim, egerim, commemoro uesperis. Hae sunt exercitationes ingenii, haec curricula mentis. Hoc queo dicere, non me quidem iis esse uiribus, quibus aut miles bello Punico, aut quaestor eodem bello, aut consul in Hispania fuerim, aut quadrien- nio post, cum tribunus militum depugnaui ad Thermopylas; sed tamen, ut uidetis, non plane me enerua- uit aut afflixit senectus, non curia uires meas desiderat, non Rostra, non amici, non clientes, non hospites. Non igitur ipsa senectus, sed neglecta temperantia, neglecta uoluptatum uitaeque moderatio, tanquam causae incom- modorum, quibus affligeris, accusandae. Sed ita est, se quisque absoluere gestit, transfert & proprias aliena in crimina culpas; uel, uti mentem nostram probe expres- sit Sallustius, sin, inquiens, prauis cupiditatibus, ad iner- tiam & uoluptates corporis pessundatus est, perniciofa libidine paulisper usus: ubi per socordiam uires, tem- pus, ingenium defluxere, naturae infirmitas accusatur, suam



suam quippe culpam actores ad negotia transferunt. Quod si hominibus bonarum rerum tanta cura esset, quanto studio aliena, ac nihil profutura, multum etiam periculosa petunt, eo magnitudinis procederent, ubi pro mortalibus gloria aeterni fierent. Has cautelas, haec monita in succum & sanguinem conuertens Ludouicus Cornarus, Nobilis Venetus, suo corpori, suae menti, suae senectuti optime prospexit, qui in iuuentute, peruersae uitio diaetae, uariis affectus morbis, cum nullum ex medicamentis perciperet emolumentum, sola uitae sobrietate ac continentia, in omnibus, quae sanitati conseruandae seruiunt, exacte obseruata, effecit, ut longaeuus, sanus, incolumis, tranquillus ac uegetus diu superstes fuerit. Notatu atque imitatu dignissima sunt, quae idem de exoptato senectutis suae statu refert, indicatis enim ac demonstratis, quos a sobrietate senserit, fructibus, in haec erumpit uerba: ex his perspicuum est, uitam, quam ego uiuo in hac aetate, non esse uitam mortuam, tristem, morosam, sed uiuidam, laetam, iucundam. Neque, si mihi optio detur, uelim mutare aetatem, & corporis mei statum cum iuuenili eorum, qui sectantur suos appetitus, etsi optimi sint temperamenti, & naturae robustissimae; quia tales quotidie sunt expositi mille morbis, & mortibus, sicut quotidiana experientia docet, & ipse in me sum expertus, cum iuuenis essem. Scio, quam illa aetas sit inconsiderata, & propter caloris abundantiam animosa, & sibi ubique praefidens, spe bona in omni re, tum propter defectum experientiae, tum quia se putant ad omnia satis firmos ac ualidos. Vnde audacter se quibusuis periculis exponunt, & abacta ratione, traditoque rationis imperio in manus concupiscentiae, quaerunt ubique satisfacere suis desideriis. Nec aduertunt miseri, se hac
ratio-



ratione multos morbos, ac saepe mortem praematuram sibi accersere, quorum malorum alterum est toleratum acerbum, alterum intolerabile ac tremendum. Mors enim apparet intolerabilis omnibus sensuum & carnis mancipiis, & potissimum iuuenibus, quibus summum malum uidetur, mori ante tempus. Eadem tremenda illis, qui peccata sua, quibus uita ista mortalis est plena, & uindictam diuinae iustitiae, in poenarum aeternitate considerant. Ego uero contra ab utroque hoc malo sum immunis; a morborum metu, quia certus sum, non facile me posse in morbum incidere, morborum causis per sanctam medicinam sobrietatis excisis. A mortis anxio metu, quia tot annorum usu didici, locum dare rationi. Vnde non solum turpe mihi uidetur, timere id, quod uitari nequit, sed spero etiam, cum ad illud punctum uenero, non modicam, gratia Iesu Christi, sentire consolationem. Praeterea finis iste adhuc procul abest; scio enim, me, fortuitis euentibus sepositis, non moriturum, nisi per puram resolutionem, eo, quod per uitae meae regulam omnes alios aditus morti occluserim. Et credo, animam meam, quae in huius mei corporis statione nihil inuenit, nisi pacem ac concordiam, tum inter humores, tum inter sensum & rationem, non facile ab ea recessuram, & multis annis opus fore, ut ab ea expellatur. Vnde uideor mihi certo posse concludere, me multos adhuc annos uicturum prospera ualetudine, fruendo huius mundi aspectu & pulchritudine, & sperando, idem me facturum, per gratiam Dei, in altero, idque totum adminiculo uirtutis & sanctae sobrietatis, cui me addixi, amicum me constituens rationis, atque inimicum sensus & appetitus. Quod omnino cuilibet facile est factu, qui uult uiuere, prout decet hominem. En egregios sobrie-



tatis effectus ! en senectutem morborum expertem !
en artem bene uiuendi, ac sapienter moriendi !

Dum his occupatus cogitationibus in hanc illamue
distrabor sententiam, *humanae breuitatem uitae*, quam
Plinius commemorato loco tantopere praedicat, tantope-
re commendat, considerans, ad praematuram partim, par-
tim violentam, quam nimio literarum studio, perpetuis
lucubrationibus, constanti sublimiorum rerum perscruta-
tione, nonnulli eruditorum, aut *αὐτοχρησία*, sic dicti he-
roes, sibi accersunt, aut inferunt, deducor. Nullum est
dubium, quod meditationes diutius continuatae ac pro-
tractae, sisyphiaque studiorum, sine ulla requie ac recrea-
tione, cultura, uires prosterнат, uiamque ad diuersos mor-
bos, & praematuram mortem sternat, ita, ut mors hoc
uitae genus sequens, *sapientiae effectus*, & huiusmodi ho-
mines *per sapientiam mori*, uideantur. Finge iam mihi
exemplar sapientiae, Erasmi est sententia, hominem, qui to-
tam pueritiam, atque adolescentiam in perdiscendis disci-
plinis contriuerit, & suauissimam uitae partem perpetuis
uigiliis, curis, sudoribus, perdiderit, semper parcus, tri-
stis, tetricus, pallore, macie, ualetudine, lippitudine con-
fectus, senio canitiaeque multo ante tempus contracta,
ante diem fugiens e uita. Annon uidetis tetricos istos, &
uel philosophiae studiis, uel seriis atque arduis addictos
negotiis, priusquam plane iuuenes sint, iam consenuisse,
uidelicet curis & assidua acrique cogitationum agitatio-
ne, sensim spiritus & succum illum uitalem exhauriente.
Nam, qui erudite ad paucorum doctorum iudicium scri-
bunt, quique nec Persium, nec Laelium iudicem recu-
sant, mihi quidem miserandi magis, quam beati uidentur.
Addunt, mutant, adimunt, reponunt, repetunt, recudunt,
nonnumquam in annum premunt, nec unquam sibi satisfaciunt,



ac futile praemium, nempe laudem, eamque perpauco-
rum, tanti emunt, tot uigiliis, tantaque somni, rerum
omnium dulcissimi, iactura, tot sudoribus, tot crucibus.
Adde nunc ualeitudinis dispendium, formae perniciem,
lippitudinem, aut etiam coecitatem, paupertatem, inui-
diam, uoluptatum abstinenciam, senectutem praeprope-
ram, *mortem praematuram*, & quae sunt alia eiusmodi.
Non opus esse iudico, plura, ad huius sciti demonstratio-
nem, exempla allegare, cum constans experientia, opti-
ma rerum magistra, multa quotidie suppeditet testimonia.
Quemadmodum uero certum ac perpetuum, quod prae-
maturus, rigida literati laboris continuatione, neglecta
necessaria corporis cultura, obitus accersatur, ita huius-
modi literati, non uiris doctis ac genuinis sapientiae cul-
toribus sunt annumerandi. Quot enim inter eosdem
reperiuntur, peregrinarum studio linguarum addictissi-
mi, perenni memoriae exercitio, corpus mentemque, si-
ne remissione, fatigantes & eneruantes, qui, psittacorum
quidem more, hac illaue dialecto cum exteris gentibus
loqui possunt? praeter haec autem, uel necessariarum
cognitione rerum omnino destituuntur, uel praeconce-
ptis uulgi opinionibus occupati deprauatum obtinent iu-
dicium; unde rerum pretiis non rite perspectis, mala pro
bonis amplectuntur. Quot praeterea ex sic dictis sapien-
tibus ac doctis recenferi possunt, qui in prosequendis stu-
diis suis indefessi, montes ipsos de loco mouere uidentur?
fin res respicias, quibus operam, tempus ac sanitatem
impendunt, easdem ne commemoratione dignas inue-
nies; tales, iam de euincenda plurium mundorum exi-
stentia, uel inuenienda per aerem nauigandi methodo
solliciti, inanibus mentem corpusque lassant cogitationi-
bus. Quid dicam de chiromantia, pyromantia, necro-
mantia,



mantia, hydromantia, astrologia diuinatrice? perapposite in harum nugarum studiosos quadrat Demonacis responsio, qui a curiosis quibusdam hominibus interrogatus, an mundus esset animatus globosusque? *περὶ τῷ κόσμῳ πολυπραγμονεῖτε, περὶ δὲ τῆς ἑαυτῶν ἀκοσμίας ἡ Φροντίς* τε, uos, inquit, de mundo, superuacua occupamini curiositate, at uestram ipsorum immunditiem ac turpitudinem non consideratis ac curatis. Habent & nostra tempora plures, qui Thaletem imitantes, ac coelum intuentes, ea, quae Deus sibi soli reseruauit, explorare satagunt, nec ea, quae ante pedes oculosque sunt, pericula ac damna, in terris aduertunt. Quot denique, qui omnia scire student, ab una ad alteram progredientes ac redeunt scientiam & artem, meris mentem, hinc inde uagando, chimaeris, ac corpus, uitae sedentariae nimis indulgendo, impuritatibus replent. Nihil dulcius & iucundius est, quam sua agere; fac tua, quae tua sunt, cetera linque Deo. Obserua, quae urget Xenophon, *ἀδύνατον*, scribens, *πολλὰ τεχνώμενον ἄνθρωπον, πάντα καλῶς ποιεῖν*, neminem scilicet posse multa simul facere, & eadem recte. Indicati homines genii sapientum catalogo haud accensendi, mihi enim sapiens Aeschylum sequenti est, *ὁ χεῖσιμ' εἰδώς, ἢ ὁ πολλὰ εἰδώς*, qui necessaria, non qui multa scit. Pertinet & huc Platonis dictum, *ὁ σοφὸς αὐτῷ δὲ μάλιστα εἶναι σοφός*, sapiens sibi ipsi sapientia sua succurrere debet. Nec quicquam sapit sapiens, qui sibi ipsi prodesse nequit. Ne sapientis quidem nomine huiusmodi dignus, ac sophista a Menandro adaequate dicitur: *μισῶ σοφιστὴν*, ait idem, *ὅστις ἢ αὐτῷ σοφός*. Nam doctrina debet ad facta tendere, non otii, aut inutilis loquacitatis causa usurpari. Morbi dehinc, ac praematura mors, quae tali peruersa studiorum cultura acceleratur, non *sapientiae* studio tribuenda, multo minus pro

sapient-

sapientiae, sed *dementiae* potius effectu habenda. *Sapientia* quippe non tam in rerum cognitione, quam genuino cognitarum ac perspectarum usu consistit, cuius auxilio & beneficio plures sapientes, uti antecedentibus iam probatum exemplis, non longaeuitatem, sed senectutem quoque morbis liberam adepti sunt. Sit igitur modus in rebus, sint certi denique fines; studia quandoque cum corporis motu permutentur; seriis sepositis, concessa corporis vires recreatione excitentur ac reuocentur. Et corporis cura, monet *Basilius*, necessario habenda est, non ipsius gratia, sed, ut seruitio illius ad philosophica studia uti possimus. Impossibile enim est, nisi famulatum corporis ad philosophiam obtemperantius habeamus, uel diuinis lectionibus operam dare, uel mente in corpore aegro languente, orationi conuenienter insistere, uel omnino quicquam eorum, quae ad philosophiam conferunt, in nostrorum sociorum utilitatem operari. Iustam, si haec respicias, *S. Antonius* habebat causam reprehendendi illum, qui corporis exercitia, quibus una cum Sociis, ualeitudinis ergo, *Antonius* utebatur, mala iudicabat; quamobrem, ait ille, tu nostro hoc offenderis exercitio, quod hic cum ualeitudinis & corporis nostri commodo instituimus, quod sine dubio, si nimium affligeremus, corrupturi essemus. Quod caret alterna requie, durabile non est. Minime uero hinc putet quis, studia friuole esse tractanda; indefessam eadem requirunt curam, quae tamen ita suscipienda, ut necessariam corporis & ualeitudinis habeamus rationem. Pessimus hinc illi literis ac suis rebus consulunt, qui rerum cognitarum culturam atque exercitium, finitis iam, uti formula habet, annis Academicis, deferentes, otio ac uoluptatibus seruiendo, tempus, quo nihil pretiosius, inu-

tiliter transigunt, imo perdunt. Etiam in senectute sapientiae studium continuare ac prosequi nos decet, similia Diogenis factis praestantes, qui iam senex a quodam admonitus, ut iam a literarum laboribus quiesceret, τί δὲ inquit, εἰ δολιχὸν ἔδραμον, πρὸς τῷ τέλει ἔδει με ἀνείναι, καὶ μὴ μᾶλλον ἐπιτεῖναι; quid, si in stadio currerem, utrum oportet iam metae vicinum a cursu remittere, an magis intendere? Simile quid de Solone Atheniensi refertur, qui, quotidie aliquid addiscendo, senior factus, cum summa virium prostratio appropinquantem denunciaret mortem, atque amici lecto assidentes inter se differerent, caput attollens ad audiendum inclinavit, atque interrogatus, quem in finem hoc faceret? ut perspecto, respondit, disputationis uestrae argumento, doctior & sapientior moriar. Ea ratione, ea tranquillitate, mortem imminentem expectare, vitamque eo sapientiae amore finire, est utique *per sapientiam mori*. An uero haec explicatio Pliniana sensui sententiae satisfaciat, anceps omnino ac dubius haereo, cum Plinius allegato capite, ac tum antecedentibus, tum sequentibus, literarum culturam cultoresque, atque hinc expectanda uel emolumenta, uel detrimenta, ne unico quidem uerbo commemoret, ac de nulla alia re, quam humanarum inconstantia ac miseria rerum differens, fati providentiam ac uitae laudet breuitatem.

Nunc demum, Pliniana opera manu terens, menteque uoluens & perquirens, facilem expeditamque dubiae, quae animos in contraria uocauit, & coniecturarum multitudine distraxit, sententiae explicationem, imo perspicuam illius ex ipsis Plinii scriptis erutam demonstrationem inuenisse mihi uideor. Nullum alium hic Plinius morbum, quam *αὐτοχρησίαν* innuit, quae, ex mea
men-

sententia, grauissimus ac perniciosissimus mentis delirantis, desperantis, uerum ueri Dei cultum ignorantis, ab omni humanitate alienae affectus atque effectus est. Sin uero Plinium Pliniique principia, Stoicae erroribus philosophiae inquinata, respicias, excelsi erit uirtus animi, qua diffracto destructoque, per enssem intra pectus adactum, aliamue similem laesionem, corporis carcere, dissolutisque, quibus anima detinebatur, compedibus, eadem iam sui reddita iuris, ad Elysios, quos sibi fingeabant, campos, laeta, ouans atque exultans migrat. Quocunque uero modo *αυτοχειρίαν* definiamus, atque explicemus, hoc tamen certum semper manebit, quod mortem *αυτοχειρίαν* inductam, sine ui atque iniuria humano illata corpori, ac hanc sequente morbo, quem mors excipit, haud poterit sibi Plinius concipere. Morbus uero ac mors, *αυτοχειρίαν* sequens, pro sapientiae ac fortitudinis fructu a Plinio habentur, ita, ut *τὸ mori per sapientiam*, uoluntariam, quam sibi quisque, uitae huius pertaesus, aut ignominiam fugiens, consciuit, necem, significet. Hinc Plinius (c) *incertum ac fragile munus naturae*, hominum incolumitati prospiciens, appellat. Hinc ab eodem *malignum ac breue*, quicquid natura mortalibus dedit, dicitur. Hinc naturam, *ob tot periculorum genera, tot morbos, tot metus, tot curas, toties inuocata morte, ut nullum frequentius sit uotum*, accusans, denuo, *uitae breuitatem*, tanquam maximum, quod hominibus a natura sit concessum, *beneficium*, allegando, excusat, defendit, laudat. Perinde certe, ac si Plinius innuere ac demonstrare uoluisset, quod, uti unica sit in uitam uia, ita mille modis, homini, si libeat, exire liceat, modo prudentia utatur, fortique sit animo. Ne uero aliquid Plinio affingere uidear, a mente illius remotum, iam

iam allegatorum ueritatem ac certitudinem, ipsissimis Plinii euietam uerbis uobis sistam. Hac ratione idem, (d) uenenorum in atroci morbo usum approbans, asserit: *eam uitae esse conditionem, ut mori plerumque etiam optimi portus sit.* Allegat porro PLINIVS (e) populos Hyperboreos, quos felices dicit, de quorum uita & morte, sequentia annotauit: mors non nisi satietate uitae epulatis delibutisque luxu, ex quadam rupe in mare salientibus. *Hoc genus sepulturae beatissimum.* Propius idem (f) ad scopum accedit, & quae eiusdem sit mens, clarius in descriptione gentium Indiam incolentium occupatus declarat, ubi haec relata leguntur: quintum genus celebratae illis, & prope in religionem uersae, *sapientiae deditum, uoluntaria semper morte, uitam, accenso prius rogo, finiunt.* Confer iam haec, & concilia, quaeso, cum ea, de qua disputamus, sententia. Venena, mortis accelerandae ergo, approbare; hominum se ipsos interficientium atque in mare praecipitantium *sepulturam beatissimam* dicere; gentem illam, quae se ipsam ignis ui ac tortura perimit, *sapientiae deditam* pronunciare, haec omnia, haec inquam, sufficientia sunt argumenta, quibus cognoscimus, a Plinio *αυτοχειρίαν* admitti tanquam laudabilem, eaque ratione procuratam mortem, esse *mori per sapientiam.* En miserum philosophiae gentilis, Stoicae praesertim, statum! en graues, quos eadem fouet, errores! Non sum nescius, plures uiros graues, ac sic dictos sapientes, *αυτοχειρίαν*, pro morte honesta ac gloriosa, eaque extinctos pro sapientibus ac fortibus habuisse. Reticeo, quae passim in Senecae scriptis occurrunt. Memoria plane indi-

(d) Hist. Natur. edit. cit. lib. 25. cap. 2. p. 449.

(e) Lib. 4. cap. 12. p. 59.

(f) Lib. 6. cap. 19. p. 88.



indignus est, uaser ille ex cacodaemonum consu Silenus, qui, mortem uitae aerumnis potiore esse, persuasus, cum spe, e malis suis eluctandi, a Rege Mida captus, destitueretur, laqueo misera prorsus ratione suspensus uitam finiuit, illud Agathii succinendo, se consolans: τὸν θάνατον τί φοβῆις, τὴν ἡσυχίης γενετῆρα, τὸν πᾶν ὄντα νόσος, καὶ πένις ὁδύνας; μῆνος ἀπαξ θνητοῖς παραγίνεται, ὅδε ποτ' αὐτὸν εἶδε τις θνητῶν δεύτερον ἐρχόμενον. Sufficiant haec, Cassii, Bruti, Titinii, Q. Catuli, Lucretiae, Imilconis, aliorumque, qui se ipsos uita priuarunt, exempla ne adducam quidem. Leonidas percontanti, quam ob causam fortes uiri gloriosam mortem ignominiosae uitae anteponant? ὅτι, inquit, τὸ μὲν τῆς Φύσεως ἴδιον, τὸ δὲ αὐτῶν εἶναι νομίζουσιν, quoniam scilicet naturae proprium alterum, alterum peculiariter suum esse ducunt. Misera sane ratio, & magis adhuc huiusmodi hominum conditio miseranda. Bias melius rem acu tetigit, ille quippe interrogatus, quatenam mors mala censenda? ὁ θάνατος ὁ ἀπὸ τῶν νόμων ἐπαγόμενος, mors, respondit, quam leges dictitant. Longe adhuc deteriore, turpiore, magisque abominandam iudico αὐτοχειρίαν. Si enim huiusmodi homo aliquid mortis dignum poena commisit, adeundus magistratus, atque expectanda, quam iudex feret, sententia. Si uero ab huiusmodi crimine liber atque immunis est, cur, se ipsum, innocentem, omnisque expertem culpae, occidens, carnifice crudelior existit? cur, sine causa, diuinis repugnans praeceptis, in propria saeuit uiscera? Multi iam gentilium sapientum, αὐτοχειρίαν, tanquam mentis prorsus emotae effectum, damnarunt, quibus merito Rex Dionysius iunior annumeratur, qui regno pulsus, ab impudentibus irrisus atque interrogatus, quid tibi Plato ac philosophia profuit? τὸ τηλικαύτην, regessit, τύχης μεταβολὴν ῥα-
E
δίως



ὅλος ὑπομένειν. Multum omnino, tantam enim fortunae mutationem, quae a regio sceptro ad scholasticam relegat ferulam, aequo ferre animo, nonnisi sapientis est. Vita quid charius? quid amore uitae maius? quid cura sanitatis ac longaeuitatis mortalibus antiquius? Cogitationes omnes, artes, ingenium, industria, vires, affectiones ipsae, uel perferendae, uel conseruandae uitae deseruiunt. Quid igitur crudelius, quid immanius, quid atrocius esse potest? quam uitae suae, arrepto ferro, uel laqueo, deglutito ueneno, incisus, uel contortis compressisque iuguli uasis, aut protracta diutius inedia, uim inferre. Ac, quod omni dolore acerbius, omnique calamitate perniciosius, huiusmodi homines leuiorum impatientes malorum, dum desperatis rebus finem quaerunt, in grauiissimas aeternasque, quae nullam unquam admittunt medelam, aerumnas se praecipitant. Tam seueram homicidii poenam, tam serio, Deus inculcauit; qua afficietur ille, qui sibi ipsi necem conficiuit? Non occides, Dei est mandatum, non occides alterum, ergo nec te. Nullus tam immanis est homicida, quam qui sibi ipsi non parcendo, spontanea uitam abrumpit morte. Quanto propinquiorem quisque peremerit, tanto iudicatur immatior; qui ergo se ipsum occidit, nequissimus omnium est homicida, quia nemo est homini semet ipso propinquior. Hoc dicimus, uerba sunt Augustini. hoc asserimus, hoc modis omnibus approbamus, neminem, spontaneam mortem sibi inferre debere, uelut fugiendo molestias temporales, ne incidat in perpetuas. Neminem, propter aliena peccata, ne hoc ipso incipiat habere grauissimum proprium, quem non polluebat alienum. Neminem propter sua peccata praeterita, propter quae magis hac uita opus est, ut possint poenitendo sanari. Neminem, uelut desiderio
uitae



uitae melioris, quae post mortem speratur, quia reos suae mortis melior post mortem uita non suscipit.

Quemadmodum uero, in hanc sententiam, uno omnium uerorum Christianorum ore approbatam, omnibusque genuinorum philosophorum calculis confirmatam, pedibus discedo, ita mihi opinio Plinii, *αυτοχειρίαν*, tanquam artem sapienter moriendi, commendantis, neutiquam probatur. Haud mediocriter quoque meae in Plinianum apophtegma meditationes a Dalechampii, Mercurialis & Salmasii explicatione dissident. *Morbus* enim, quo per sapientiam mori, Plinius tradit, allegatis autoribus est *phrenitis*, quam a Plinio morbum sapientiae, sequenti capite appellatam fuisse, unanimi affirmant consensu. Verisimiliorem, inquit Salmasius, non diffitebor illam mihi semper esse uisam Mercurialis ac Dalechampii sententiam, qui *Φρενίτιν* intelligi putarunt. Ita certe *Φρενίτις* dici potest τῶν Φρενῶν νόσος, uti ἀρθρίτις τῶν ἀρθρῶν, ac πλευρίτις τῶν πλευρῶν. Quidni, inquam, sapientiae morbus certe dicatur, ut lateris morbus, & articulorum dici Latinis consuevit, quam pleuritin, aut arthritin, unica uoce uocant Graeci? Certe *Φρένας* pro sapientia Graeci iidem passim usurpant, unde *Φρενήνης* sapiens ab illis nuncupatur, qui tamen & desipientem sic uocare solent. Vtriusque enim significationis *χεῖν* adnotant ueteres Grammatici. Etymologicum magnum habet *Φρενήρης*, *Φρόνιμος ἢ παρά-Φρων*. Plinius eo capite, quo notasti, per sapientiam mori, dixit, ac capite sequenti longe clarius, sapientiae aegritudinem appellat, quam uix aliter interpretari liceat, quam *Φρενίτιν*. Praecipua huius sententiae fundamenta quae Salmasius allegat, sunt, quod 1) *Φρεν* mentem, & *Φρένς* sapientiam, ac hinc *Φρενίτις* sapientiae morbum Graecis denotent; 2) quod Plinius sequenti capite, morbum sapien-

sapientiae alleget, atque ad Hippocratem prouocans, eadem, quae apud
 Coum in phrenitidis descriptione occurrunt, signa enumeret; 3) quod
 Φρενῆρης & sapientem, & dementem, ex usu Graecis recepto, significet,
 unde, τὸ *per sapientiam mori*, idem esse, ac Graecis; 4) τὸ Φρενιτικὸν ἀπο-
 θνήσκειν, uel τῶν Φρενῶν ἐκστάσει τελευτᾶν. Nullus uero harum re-
 rum gnarus, mihi uitio uertet, si haec argumenta futilia omnique de-
 monstrandi facultate destituta dico. Sunt utique Φρενῆν mens, & Φρε-
 νῆς sapientia, seu membranae cerebri, illa primitiua, a quibus Φρενῆτις
 deriuatur. Est omnino Φρενῆτις, *morbis sapientiae*, hoc est, amentia, de-
 lirium, febrem comitans acutam. Est sane Φρενῆτις, ab Hippocrate de-
 scripta, *morbis sapientiae*, quem commemorat Plinius. Sed, quid inde?
 nihil aliud prorsus, quam homines hoc modo obeuntes, non *per sapien-*
tiam, sed *per dementiam*, *mori*. Verum Φρενῆρης, regeris, Graecis & sapien-
 tem, & dementem, indicat. Ast, quid haec ad praesentis sententiae Plin-
 ianae explicationem. Hic enim non de genuina, uocabuli Φρενῆρης,
 sed phraseos, *per sapientiam mori*, significatione sermo est. Vbi uero,
 & a quo, sapientia pro dementia, uel dementia loco sapientiae, in exa-
 cta rerum descriptione, adhibita fuit. Ex mente Salmasii, τὸ *mori per*
sapientiam, idem esset, ac *mori per dementiam*. Quod a Plinii senten-
 tia, atque omni, quae hic indicatur, sapientia, plane abhorret. Nec
 phrenitis, mortis causa, sed prodromus est; imò plurimi aegroti phre-
 nitide affecti, ante mortem, ad se redeuntes, & dictis & factis se omnis
 amentiae expertes esse, & hinc non ex phrenitide, sed alia plane cau-
 sa, cuius effectus pariter fuit phrenitis, obire, docent ac demonstrant.
 Reliqua, quae ad sui sciti defensionem urget Salmasius, nullius plane
 sunt momenti, nam praeter phrenitidis signa, ab Hippocrate descripta,
 quibus huius mali praesentiam cognoscimus, nihil quicquam inuenies.
 Verum, quid haec ad rem? Maximae autem dignitatis argumentum,
 a Beuerouicio suppeditatum, neglexit Salmasius; Abderitae enim,
 cum Democritum iam ridentem, iam profundioribus inhaerentem
 cogitationibus conspicerent, arbitantes, eundem, ex nimio sapientiae
 studio, amentem esse factum, his ad Hippocratem scriptis, eius prae-
 sentiam atque opem efflagitabant, implorabant, sequentem morbi cau-
 sam adducendo: ὅτις ὑπὸ πολλῆς τῆς κατεχέουσης αὐτὸν σοφίης νε-
 νόσκηκεν. Ea plane ratione, uti de Cleombroto refertur, qui Platonis
 librum de animarum immortalitate legens, ex sapiente amens factus,
 se

se in mare praecipitavit. Praesens historia illustrandae supra a nobis datae loci Pliniani explicationi, *αὐτοχρησίαν* respicienti, servit. In superiori autem Abderitarum dicto, quod apud Hippocratem extat, si expendamus, unde idem sit profectum, facile tota lis simul & semel dirimeretur. Populus erat, magnus ille errorum magister, in quo nec mens, nec ratio, nec consilium, nec auxilium, qui stultissime de rebus statuque Democriti iudicans, haec ad Hippocratem perscripta miserat. Ea de causa, Hippocrates e longinquo primum Democritum contemplans, eius actiones examinans, & cum eo de diuersis rebus, propius accedendo, sermonem instituens, pronunciabat: non Democritum, sed Abderitarum populum amentia laborantem, cerebri purgatione, helleboro perficienda, opus habere. Non ignoti alias sunt casus, ubi literati in amentiam, praecipue in sic dictam maniam ac melancholiam hypochondriacam, incidunt, ubi superabundans sapientia atque eruditio in crimen a uulgo uocatur, *ex hac sicb überstudiret*. Mihi uero nihil magis risu dignum, quam allegata causa, loquendique formula, uidetur. Quantum est, quod nescimus; nullus magnam, multo minus nimiam sapientiam atque eruditionem sibi comparare potest. Contingit uero aliquando, partim, ob rationes antecedendibus iam allegatas, partim, si homines uel stupidiores, uel nasutuli, in Dei maiestatem atque arcana a cognitione nostra procul remota inquirunt, ac perpetuo anxii defixa in uno eodemque obiecto mente haerentes, nullam animo, nullam corpori concedunt quietem, ut, loco sapientiae, quam inuestigando quaerunt, in amentiam incidunt. His inculcanda Pauli regula, qui iubet nos, non plus sapere, quam oporteat. Hebraeus concionator, idem pariter monet, altiora, dicens, te ne quaesieris, & fortiora te ne scrutatus fueris; sed quae praecepit tibi Deus, illa cogita semper, & in pluribus operibus eius ne sis curiosus. Plures praeterea sic dicti literati reperiuntur, quos nec uita sedentaria, nec sublimiorum rerum cura, sed pessimum uitae genus, ad incitas ac desperationem redegit, & furiosos reddidit, adeo, ut haud raro mortem sibi, in proprium facientes corpus, consciuerint, aut etiam amentia simulata, hominum misericordiam & beneuolentiam conciliare annisi fuerint.

Quae, cum inter omnes constent, ac per se certa, clara ac manifesta sint, ne coniectura quidem assequi potui, ac plane adhuc desidero rationes, qui-



bus commotus Franckus de Franckenau, Patris de la Cerda sententiam reprobans, Calderae de Heredia, Medici Hispani, explicationem approbavit. Rebus ad amissim expensis, utriusque quidem opinionem a uero Plinii sensu alienam, deprehendimus, maiori tamen ueritatis specie Patris de la Cerda iudicium se commendat. Caldera de Heredia, *mori per sapientiam*, esse phrenitide, mania, aliaque uel furoris, uel amentiae specie laborantem obire. Quae Caldera ex Dalechampio & Mercuriali descripta, scriptis suis, nulla citatorum auctorum facta mentione, fideliter inseruit. Varia igitur miscellanea, elegantis saepe eruditionis referta, ob quae huius auctoris lectionem tantopere Franckus de Franckenau commendat, pleniora, liquidiora, ac uerifimiliora allegatis iam auctoribus legi possunt. Vbi & hoc notari meretur, quod Dalechampius & eius affeculae, qui solam phrenitidem hic intelligendam esse censent, probabiles aliqua ex parte rationes, a Graecis terminis, *Φρήν*, *Φρένες*, *Φρενίτης* petitas, adducant, quae ad reliquas deliriorum species, maniam scilicet, melancholiam, tarantismum, cynanthropiam, choream S. Viti, explicandas, minus commode applicari possunt. Patri uero de la Cerda, *morbis per sapientiam mori*, illam uaticinandi & futura praedicendi facultatem notat, quam in aegris & moribundis saepius fuisse obseruatam, Tacito, Huarto, Aretaeo, Horstio, Mollero, Crusio, testibus, cognoscimus. Non ignotum quidem, quosdam homines, & diem & horam mortis suae futuram, indicasse, aliaque aliis post mortem euentura praedixisse. Plurimis pariter historiis constat, homines illiteratos acutis laborantes febribus, peregrina & iis prorsus ignota dialecto, concinne atque erudite, Oratorum instar, locutos fuisse. Haec uero ad allegatae sententiae demonstrationem minus sufficiunt; nam 1) nullam prorsus praesenti capite uaticiniorum mentionem Plinius fecit. Vaticinia 2) ridiculum saepissime habuerunt euentum, cum aegrotis pristinae sanitati restitutis, effectus aliud plane, quam innuerunt uaticinia, demonstrarit. Vnde 3) nostrorum uaticinia seculorum pro somniis, & magis pro dementiae, quam sapientiae fructu habeo. Quibus 4) addendum, quod nullus per artem uaticinandi, sed uim morbi, motum sanguinis sufflaminantis, moriatur.

Plura adhuc de termino mortis fatali, qui *morbo Plinii per sapientiam mori*, satis adaequata accommodari posset argumentatione, dicenda

da restant, sed de hoc, peculiari scripto, demonstraturus, ὅτι ὁλος ὁ ἀν-
 ὄρωπος, uti loquitur Hippocrates, ἐκ τῆς γενετῆς νῆσος ἐστίν, agam. An-
 tequam uero ad monita Philiatris iniungenda progrediar, iis, qui meis
 fauent studiis, eadem una mecum de meliori commendo, illos uero,
 qui illa canino rodunt ac lacerant dente, monitos uolo, ut, uel meis
 meliora ac praestantiora, edant, aut, si hoc non possunt praestare, ini-
 quam sibi ipsis referuent censuram. Inter plures calamitates lacry-
 mis sane maiores, quibus perpetuo affligor, inter tot, tam molestos, eos-
 que perpetuos labores, quorum mercede & praemiis alii fruuntur, ni-
 hil molestius, nihil acerbius mihi fuit, quam iniquorum recordatio iu-
 dicioꝝ, quae de me meisque scriptis maleuoli tulerunt obtrecta-
 tores. Alii historias meis insertas scriptis, quas peculiari collectas ac
 notatas libro exhibere possum, ad hunc illumue aegrotum aegrotamue,
 male, sine ullo fundamento, applicantes, optimorum ac mihi amicissi-
 morum uirorum odia conciliare allaborarunt. Alios uero male plane
 habuit, quod ego Stahlianorum errores uiuis plane coloribus descri-
 pserim. Hinc iidem, morum concinnitatem, seu uitae ornatum ac
 decorum, uti Cicero loquitur, in me desiderari, clamant, aut, ut eorum
 formulis gallicis utar: *C'est un homme sans conduite; C'est un
 homme de mauuaise conduite; Il n'a point de conduite.* En egre-
 giam phrasium gallicarum elegantiam! Sane uero. Putant quippe
 huiusmodi psittaci gallici, nihil sine huiusmodi formulis pulchrum,
 nihilque iucundum esse. Satis mihi nota, mihi que fortassis magis, quam
 tibi, quam uobis curae cordique est Socratis sententia: quod, uti ui-
 num austerum, non est aptum potioni, sic mores agrestes non apti sint
 hominum consuetudini. Sed, qua de causa mei mores tibi displicent?
 Restrungi a me regeris Stahliana aliaque praeiudicia. Video iam ar-
 gumentationis tuae fundamentum. Quicumque igitur errores alio-
 rum manifestat ac reprobat, ille, ex tua mente, morum concinnitate
 destituitur. Egregia sane ars concludendi!! Sed multi uiri celebres,
 denuo excipis, non doctores saltem, uerum aliis maioris momenti titu-
 lis superbientes, Stahlianis principiis sunt addicti. Egregia plane ars
 persuadendi!! Multitudo errantium non parit errori patrocinium.
 Nonne nosti, plures hodie medicos, esse puros putos empiricos, *es seynd
 vertreffliche Quacksalber*. Hinc non mireris, quod iidem, cum in Aca-
 demiis tempus otio ac luxu transegerint, ad hoc ignorantiae asylum
 con-



confugiant. Nec mireris, eosdem Stahlianorum errorum demonstratione tantopere commoueri; nam, subruto dirutoque, ad quod tuto confugiebant, propugnaculo, ac detracto, quo se ornauerant ac uelaue-
rant, tegmine, nuda sistitur eorum ignorantia. Sed satis de his. Imitabor in posterum Platonem, qui a Dionysio per epistolas rogatus, ne male de illo loqueretur, respondit: *μη τοσαύτην αὐτῷ χολήν εἶναι, ὥστε Διονυσίῳ μεμῆσθαι*. Eodem plane modo huiusmodi obtrectatores ne memoria quidem amplius dignos iudicabo, atque ab iisdem laceffitus cogitabo: Petrus currit; currat ergo, currat cito.

Vos uero, Philiatrī charissimi! uos, o mei! oro, rogo, ac per uestram omnibus precibus obtestor salutem, ut inchoatum studiorum uestrorum cursum strenue prosequamini. Tempus abit subito, nec ullis postibus haeret; temporis igitur magna cura habenda, nam eius iactura irreparabilis est; discite, eunt anni more fluentis aquae. Nihil sine magno uita dedit mortalibus; multis rigida quercus domatur ictibus; laurea uero desidiaē praebetur nulla. Vos a proposito uestro artis prolixitas ac difficultas non deterreat; nihil tam difficile, quin quaerendo inuestigari possit; cum Minerua manum quoque admouete; uentis destituti remos adhibete; ubi intenderitis ingenium, ualet; didicisse fideliter artes, emollit mores nec sinit esse feros. Ac cum difficile sit tenere, quae didicistis, nisi exerceatis, hinc semper uobis pendeat hamus; absit a uobis persuasio sapientiae, quae profectus impedimentum est; pennas nido maiores ne extendatis. Considerate, quod homo, ad imaginem Dei conditus, uestrae artis sit obiectum. De humano igitur corio ne ludatis, sed necessaria discendo, atque utilia perficiendo, mentis uestrae tranquillitatem atque integritatem tueri studeatis. Fidus, Dei fultus gratia, uobis ero Achates, uestraque promoturus commoda, lectionibus physiologicis & practicis, quas praeterito mense Ianuario iam inchoaui, 1) collegium semiologico-casuale in aphorismos Hippocratis, 2) theoretico-practicum in medicinam meam aphoristicam, 3) Diaeteticum in praecepta iamiam edenda, & 4) Disputatorium, adiungam. Deus necessarias largiatur uires. Malo, labore atteri, aliisque inseruiendo consumtus, tranquilla obire mente, quam desidiaē indulgendo, neglecto animi pastu, molestant corporis saginam contrahere. Dabam Vitembergae e Museo Idibus

Februarii Anno cIdo Idcccxxxvi.

